

Cuira u Landquart?

L'evaluaziun dal lieu futur da la scola auta da Cuira ha leventà malaveglia

■ **(anr/ac) L'evaluaziun dal lieu futur da la Scola auta da Cuira ha leventà la malaveglia dal deputà e president da la citad da Cuira Urs Marti. El ha renfatschà il mardi passà en il cussegl grond a la regenza mancanza da trasparenza e da vulair dislocar il lieu da scola da Cuira a Landquart.**

La terza giada ha il president dal cussegl grond, *Michael Pfäffli*, vuli surdar il pled al deputà *Urs Marti* (pld Cuira) en chausa evaluaziun dal lieu da la Scola auta da Cuira sulet sch'el sa sentia plementà persunalmain. Ed il deputà e president da la citad da Cuira ha cleramain affirmà la dumonda. Sco president da la citad fa Marti quitads che la regenza grischuna prevedia da dislocar la Scola auta da Cuira davent da la chapitala grischuna a Landquart. El ha renfatschà a la regenza da na giugar cun chartas avertas e da vulair prender la decisiun davos il dies dals pertutgads. Marti vesa la citad da Cuira sco sulet lieu adattà per ina scola auta en il chantun Grischun. La decisiun davart il lieu futur da la scola auta resta tar la regenza. Sustegn ha il deputà e president da la citad da Cuira survegni da la deputada *Vera Stiffler* (pld Cuira) ch'è da l'avis ch'ì na saja pussaivel da prender ina decisiun correcta entaifer ils nov mais communìtgads da la regenza. *Heinz Dudli* (pbd Tsching Vitgs) ha accentuà sia chapien-

tscha per las temas dal president da la citad da Cuira. Er el vesa Cuira sco sulet lieu adattà per ina scola auta. El ha motivà sia opiniun cun ils giavischs e basegns da studentas e students. Il cusseglier guvernativ *Martin Jäger* ha defendì l'agir da la regenza che fetschia ina evaluaziun seriusa. Betg sulet ses departament saja involvà en quel proceder, mabain er il departament da cusseglier guvernativ *Jon Domanic Parolini*. La regenza na saja betg incumbensada sulet dad evaluar in nov lieu per la Scola auta, mabain era cun ina incumbensa dal parlament da sa fatschentar cun in center d'innovaziun. I na saja nagut auter che prudent dad evaluar ina eventuala simbiosa da la Scola auta ed in futur center d'innovaziun. El ha avertì da fallidas interpretaziuns e ditg che la regenza saja londervi da far ina evaluaziun seriusa e decider sin il pli tard en nov mais. Il deputà e commember dal cussegl da la Scola auta da Cuira *Peter Peyer* (ps Trin) ha fatg attent als custs futurs da la Scola auta da Cuira en cas da la independenza da l'instituziun. El ha ditg ch'ìl cussegl da la scola auta prefereschia era vinavant Cuira sco lieu adattà per la scola auta. La regenza grischuna decida proximamain davart il lieu futur da la Scola auta da Cuira. L'evaluaziun è vegnida tematisada en il cussegl grond.



Edifiz da la Scola auta per economia e tecnica a Cuira.